

法舟叢書之十八

大佛頂首楞嚴經講義 下冊



圓瑛法彙

大佛頂首楞嚴經講義

下冊

虛雲敬題



普爲出資及讀誦受持

輾轉流通者迴向偈曰

願以此功德 消除宿現業

增長諸福慧 圓成勝善根

所有刀兵劫 及與飢饉等

悉皆盡滅除 人各習禮讓

讀誦受持人 輾轉流通者

現眷咸安樂 先亡獲超昇

風雨常調順 人民悉康寧

法界諸含識 同證無上道

法舟叢書之⑱

大佛頂首楞嚴經講義上、下共二冊

倡印者：法舟文教基金會

地址：台南縣永康市竹林街28巷15弄29號

電話：(〇六)二五四四三四二

郵撥：三〇二九四七七〇

戶名：李素華

承印者：和裕出版社

地址：台南市海佃路二段636巷5號

電話：(〇六)二五六六四四三—四

一九九九年二月恭印壹仟套廣結善緣

# 大佛頂如來密因修證了義諸菩薩萬行首楞嚴經講義

福州鼓山湧泉禪寺圓瑛弘悟述 受法弟子明暘日新敬校

寅三 六識圓通 分六 卯初 鶩子眼識 二 普賢耳識 三 難陀

鼻識 四 滿慈舌識 五 波離身識 六 目蓮意識 今初

舍利弗，即從座起，頂禮佛足，而白佛言：我曠劫來，心見清淨，如是受生，如恆河沙，世出世間，種種變化，一見則通，獲無障礙。

舍利弗，此云鶩子，起座頂禮白佛：我曠劫來，心見清淨；心見即眼識，不染色塵曰清淨。如是指眼識清淨。受生如恆河沙劫之久，世出世間，凡聖染淨諸法，六凡法界，善惡攸分，苦樂不等，四聖法界，大小差殊，權實有異，故曰種種變化。一見則通者：祇要眼識一見，隨念分別，則能通達，了然明白，獲無障礙，不必意識，計度分別，此顯多劫，眼識明利也。

## 我於中路逢迦葉波，兄弟相逐，宣說因緣，悟心無際。

舍利弗，初事沙然梵志。沙然歿後，無師可事，一日於中路，逢三迦葉波，兄弟相逐即相隨，宣說因緣深義，偈云：「因緣所生法，我說即是空；亦名爲假名，亦名中道義。」此四句，即大乘因緣，天台宗，藏、通、別、圓四教，即依此偈而立，四句依次立四教。鶖子一聞，便悟圓理，圓理即是藏心，故曰悟心；周徧法界，故曰無際。有云舍利弗，路逢馬勝比丘，威儀庠序，即趨問汝師是誰？答曰：我師釋迦牟尼。又問：汝師授汝何法，可得聞乎？答曰：我初入道，祇記得因緣之法：諸法從緣生，諸法從緣滅，我佛大沙門，常作如是說。舍利聞已，即得初果。歸告目連亦悟，二人率領徒衆，投佛出家，今云逢迦葉波者，或同時所遇，非獨一人，彼此互出耳。

從佛出家，見覺明圓，得大無畏，成阿羅漢，爲佛長子，從佛口生，從法化生。

既聞勝法，乃知師亦非常。遂從佛出家，見覺亦眼識也。向者眼識，雖得

無礙，尙未明圓，今則更承佛誨，識精明圓，得大自在，具四無畏，爲接樂小之儔，權取四果，成阿羅漢；欲伏邪外之衆，示居智魁，爲佛長子，乃以智德居長也。從佛口生，從法化生者；非說色身，乃指法身，從佛聞法，而得悟證法身，如從佛口生也。在教法中，常承法乳，長養之力，是從法化生也。

### 佛問圓通，如我所證，心見發光，光極知見，斯爲第一。

此結答圓通。如我所修所證，心見發光，即由眼識，而成無障礙智，光即智也。智光極處，徹佛知見，斯眼識最爲第一。他經云：「鷲子過去，已成金龍如來，乃不捨大悲，倒駕慈航。」則知七日通達佛法，半月得證聖果，皆示現耳。

#### 卯二 普賢耳識

普賢菩薩，即從座起，頂禮佛足，而白佛言：我已曾與恆沙如來，爲法王子，十方如來，教其弟子菩薩根者，修普賢行，從我立名。

此自述遠因。普賢菩薩：行彌法界曰普，位隣極聖曰賢。起座頂禮白佛言：我已曾與恆沙如來，爲法王子。此顯事佛之多，恆沙如來，悉皆承事，無空過者，故得證位之深，以爲法王眞子，位當等覺，可以承紹法王家業也。行願品云：「一切如來有長子，彼名號曰普賢尊。」十方諸佛如來，教其弟子，有大乘菩薩根器者，即圓頓一類之機，修普賢行，即大乘法界行，十大願王是也。此行從我立名者有二意：一、令行人有所效法；二、令普賢有所加被也。

**世尊！我用心聞，分別衆生，所有知見，若於他方恆沙界外，有一衆生，心中發明普賢行者，我於爾時，乘六牙象，分身百千，皆至其處，縱彼障深，未得見我，我與其人，暗中摩頂，擁護安慰，令其成就。**

世尊我用心聞：心聞即耳識。惟用耳識，隨念分別，不假五俱意，及獨頭意識，計度分別，便能分別衆生，所有知見。然衆生知見不一，有邪、正、大、小、權、實，種種差別，但用心聞，即能了知。若於他方，恆河沙界之外，

極言其處之遠。有一衆生，心中發明，普賢行者：先悟毘盧性海，次入普賢行門，雖然在遠不遺，如十方世界，有無量衆生，發明普賢行者，我於爾時，乘六牙象，分身百千，皆至其處；此菩薩利生念切，及時而應。準法華象是白象，表清白梵行之相，六牙表六度，乘此爲因，而到如來果地也。分身百千：極言其多，非定數也。有無量衆生，發明普賢行，菩薩即現無量身，而徧應之，此不思議之力用也。一身不分而普現，群機咸應以無違，如一月當空，影臨衆水，縱彼惑重障深，能障遇聖善根，我與其人，暗中摩頂，消其惑業，除其障難，冥中擁護，令不退轉。如無障者，現身安慰，令其增進。成就、雙指有障無障，皆得成就，普賢廣大行願心也。

### 佛問圓通，我說本因，心聞發明，分別自在，斯爲第一。

此結答圓通。我上來所說，最初本因，但用耳識，隨念分別。能發智慧光明，普照群機，得大自在，現前諸行，莫不資始乎此，故曰斯爲第一。

#### 卯三 難陀鼻識

孫陀羅難陀，即從座起，頂禮佛足，而白佛言：我初出家，



從佛入道，雖具戒律，於三摩地，心常散動，未獲無漏。世尊教我，及拘絺羅，觀鼻端白。

孫陀羅，此云艷，是妻名，難陀是本名，此云喜，連妻爲名曰艷喜。因佛會下，難陀多人，加艷以別之。是佛胞弟，具三十相，短佛四指，身亦金色，若入衆中，有不識者，謂是佛來。起座頂禮白佛言：我初出世俗家，從佛而入世道。雖具戒律：言於戒雖然無缺，於定尙未時入，故曰於三摩地，心常散動。散者心攝不起，動者心定不下，因無定不能發慧，無慧不能斷惑，故未獲無漏。世尊教我：乃因機施教。及拘絺羅，此云大膝，是舍利弗母舅，同爲散心之機。故佛教觀鼻端白，兩目注視，鼻尖微有白相，令其注心一處，收攝散動也。

我初諦觀，經三七日，見鼻中氣，出入如煙，身心內明，圓洞世界，徧成虛淨，猶如瑠璃，煙相漸銷，鼻息成白。

我初秉教諦觀，經三七日，見鼻中氣，出入如煙：當知此氣，由風火而起

，鼓煩惱濁，故其狀如煙，昧者不覺。惟諦觀能見，視微若著。煙相漸銷，鼻息成白兩句：應接如煙下，觀之既久，煩惱垂盡，煙相漸銷，出入鼻息，竟成白相。身心內明者：身心即鼻識，以肉鼻同身，內明即定成之相，定功既成，便能發慧，明即智慧光明，煩惱既銷，慧光迭發。圓滿洞徹，依報世界，徧成虛淨。虛則無礙，淨則無染，皆慧光徧鎔所致，故得內明外虛，猶如瑠璃，內外明徹。

**心開漏盡，諸出入息，化爲光明，照十方界，得阿羅漢。世尊記我，當得菩提。**

首句藏心開顯，諸漏俱盡，諸出入氣息，皆化爲智慧光明，普照十方世界，得成大阿羅漢，此轉煩惱成菩提之先聲。故世尊記我，當得菩提，即當來成佛也。

**佛問圓通，我以銷息。息久發明，明圓滅漏，斯爲第一。**

此結答圓通，不取艱、聞、鼻識，而取觀息之功。我以銷息者；始而觀鼻

攝心，見氣如烟；繼而烟相漸銷，鼻息成白，故曰銷息。銷息乃銷如烟之氣，而成白淨之息也。息久發明者：銷息既久，定力愈深，并息亦銷，諸出入息，稱性發化，成爲智慧光明。明圓滅漏者：光明圓照十方，銷滅諸漏，不僅見思，并滅塵沙無明，惟斯鼻觀，最爲第一。

卯四 滿慈舌識

富樓那彌多羅尼子，即從座起，頂禮佛足，而白佛言：我曠劫來，辯才無礙，宣說苦空，深達實相。如是乃至，恆沙如來，秘密法門，我於衆中，微妙開示，得無所畏。

滿慈子，起座頂禮白佛，自述遠因。我曠劫來，辯才無礙：此由宿命通，能憶遠劫之事。辯才有四：一、法無礙辯，能說世出世法，一一名相，無不了知；二、義無礙辯，能說諸法，差別之義，通達無礙；三、辭無礙辯，能以一言，而含無邊妙義，能收廣義，納在數語之中；四、樂說無礙辯，隨順衆生好樂，善巧方便，而爲說法。宣說苦空：對小機說小法；深達實相：對大機說

大法；又正說苦空之時，深達實相之理，了知苦本無苦，苦即法身，法身即實相也。了知真空不礙妙有，妙有不礙真空，權實諸法，隨宜能說。

如是乃至，恆沙如來，秘密法門：即大乘了義秘密深奧法門。我於大眾之中，將精微之義理，用巧妙之言詞，對衆開示，人衆既多，根器不等。開示曰：微妙者，自必三根普利，一雨均沾也。得無所畏者；分得如來，四無所畏：一、一切智無畏，二、漏盡無畏，三、說障道無畏，四、說盡苦道無畏。能於衆中，作師子吼，心無所畏，於法而得自在也。

**世尊知我，有大辯才，以音聲輪，教我發揚。我於佛前，助佛轉輪，因師子吼，成阿羅漢。世尊印我，說法無上。**

此敘現迹。本師世尊，知我有大辯才；誠爲知弟莫若師，因才而教育。以音聲輪：即口輪說法，亦即法輪。教我發揚者：教我觀機發揚，慎勿不淨錯施於爐鞴，數息竟授於塚人。我於佛前，助佛轉輪者；助揚佛化，代轉法輪。因師子吼；即說法無畏也。師子一吼，群獸皆伏，妙法一宣，邪、外歸化。以此舌識，上輔佛化，下度衆生，成阿羅漢。世尊印證我，說法人中，爲無有上。

佛問圓通，我以法音，降伏魔怨，銷滅諸漏，斯爲第一。

此結答圓通。我以舌識，說法無畏，即以法音，降伏三界諸魔，五陰怨賊，銷滅結使，以及諸漏，以斯舌識，最爲第一。

卯五 波離身職

優波離，即從座起，頂禮佛足，而白佛言：我親隨佛，逾城出家，親觀如來，六年勤苦，親見如來，降伏諸魔，制諸外道，解脫世間，貪欲諸漏。

優波離此云上首，嚴持淨戒，爲衆綱紀故。起座頂禮，而白佛言：我親隨佛，逾城出家者；據傳說，佛爲太子時，優婆離爲東宮執事之臣。及佛背父出家，彼——優婆離——亦有失職之咎，當然不安於位，且無職可供矣，故即隨佛出家。但非國王所派遣，不在五比丘之列耳。

親觀如來，六年勤苦者：太子剃除鬚髮已，將寶冠寶衣等，交車匿持回，告稟父王母后，不必憂念。淨飯王派遣五臣，同車匿往請太子回國，太子曰：

「不成佛道，不回本國。」於是與太子隨行。普曜經云：至伽闍山，苦行林，天獻麻米，日食一顆。五臣同波離，與太子伴修，五臣先後離去，惟波離始終不離，故曰親觀如來，六年勤苦。親見如來，降伏諸魔，制諸外道者：佛在雪山苦行，本可成道，祇恐貽誤衆生，以苦爲道，故不在雪山成道。遂起詣菩提樹下安坐，誓曰：「不成佛道，不起此坐。」經四十八日，波旬魔王，夢見三十二變，覺已恐怖，觀察閻浮提菩薩坐樹下，將成正覺。敕四魔女，令壞禪定，現三十二媚相，菩薩身心，寂然不動，令女自見九孔二藏，八萬蟲戶，污穢不淨，嘔吐而去。魔怒親率魔兵，有欲加害，亦無可奈何，此亦波離目觀之事，故曰親見。

制諸外道：此佛成道以後。佛未出世，印度只有外道婆羅門教，佛成道已，人多信仰，外道嫉妬，屢欲害佛，如申日以毒飯害佛，佛自念我心無毒，自不受毒，食已安然。如以醉象害佛，佛伸五指，現五師子，醉象伏地不動。又度優樓頻螺迦葉等，皆親見制諸外道也。解脫世間，貪欲諸漏者：此波離自敘悟證有由，因親觀苦行，親見降魔制外，信出世之有益，厭世間之無常，深知貪欲，爲諸漏根本，既已深知，自然不着，故曰解脫。

承佛教戒，如是乃至三千威儀，八萬微細，性業遮業，悉皆清淨，身心寂滅，成阿羅漢。

此述秉教得果。承佛教戒：即授以二百五十條比丘戒，此小乘戒也。如是乃至：漸次增進，大乘菩薩戒法。三千威儀：以行、住、坐、臥四威儀，各具二百五十成一千，對三聚淨戒，各一千則成三千。八萬微細者：以三千威儀，配身口七支，則成二萬一千，復配貪、瞋、癡、等分，合成八萬四千細行。性業遮業者：謂所戒之法，體性即惡，不待制止，犯則成業，如殺盜淫妄等，是爲性業。若所戒之法，體性非惡，以能引令作惡，佛故遮止；如飲酒食葷墾土等，是爲遮業。由是大、小兩乘之戒，悉皆能持，清淨無犯。身心寂滅，成阿羅漢者：小乘制身，故身識寂然；大乘制心，故意識亦滅。此即由戒生定，定力既成，慧光斯發，乃得人空慧，成阿羅漢道。

我是如來衆中綱紀，親印我心，持戒脩身，衆推爲上。

我是如來律中首領，於大衆中，能以戒律，整綱肅紀。統領曰綱，維持曰

紀，佛令稽查持犯，處斷重輕，統領僧衆，維持律宗，故曰我是衆中綱紀。親印我心者：此云大乘制心之戒；是我密行，無念總持，蒙佛親印我心戒清淨。小乘制身之學，持戒修身，是我顯迹，蒙佛於大衆之中，推爲無上。如智論云：「長老優波離，於五百羅漢中，持律第一」是也。

**佛問圓通，我以執身，身得自在；次第執心，心得通達，然後身心一切通利，斯爲第一。**

此結答圓通。佛問圓通，我以用也身識，執持小乘身戒，身識不起，於觸塵中，並無違順俱非等相，身得自在；由外及內，次第以身識，執持大乘心戒。心得通達者：即悟明無作妙戒，既無所持之戒，亦無能持之心，然後若身若心，不待執持，自然無犯。故曰：「一切通利。」得入圓通，以斯身識，最爲第一。

卯六 目連意識

**大目犍連，即從座起，頂禮佛足，而白佛言：我初於路乞**



食逢遇優樓頻螺伽耶那提三迦葉波，宣說如來，因緣深義，我頓發心，得大通達。

大目犍連，此云大采菽氏。起座頂禮白佛：我當初於路乞食，逢遇三迦葉波，兄弟三人，優樓頻螺此云木瓜林，依此林而修；伽耶山名，即象頭山，依此山修故，那提江名，近此江修故。宣說如來，因緣深義：即「因緣所生法，我說即是空，亦名爲假名，亦名中道義」。非取世間和合麤因緣相。有云舍利，聞說因緣之法，歸告目連，此目連自述，親聞所說。我頓發心有二義：一、發心從佛出家；二、發明意識心，即如來藏。故曰：「得大通達。」所謂窮源徹底，了知全識全性也。

如來惠我，袈裟著身，鬚髮自落。我遊十方，得無罣礙，神通發明，推爲無上，成阿羅漢。

既聞法已，仰慕於佛。聞舍利弗歸投於佛，佛呼善來比丘四字，袈裟著身，鬚髮自落，頓成比丘之相。我遊十方，得無罣礙，去住自由。神通發明者：